



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir\_yimym



tir yimym

TAPAK 7

**Sonom Wangchuk-i lumia  
longkak aitba anenogo**

**Red Sea nung amakba atema Iran  
aser Houthis merenshitsü: Trump**



VOL. XXIII ISSUE NO. 282 (ADOK 282)

DIMAPUR

KÜPTOKNÜ (SATURDAY)

CHITENI (JULY) 25, 2026

₹ 5.00

## Sorkari NTA ketdangsür 47 agienogo

New Delhi, Jul 24, 2026  
(Agencies): NEET-UG

ashishitep ken o adokba sülen Centre sorkari National Testing Agency (NTA) khenyongi balaka melenshitsü renemogo aser taruba ita inyakymtem melenshitsü imlar.

Sorkari NTA nung mapa inyaker 47 shi ka agienogo aser iba ya restructuring exercise nung shilem ka lir ta osang angazüker.

NTA-i NEET UG, JEE Main aser CUET dena national-level examinations 15 nungi 20 shi ketdangsüa agir aser India nung examination bodies tulutiba rongnung ka lir.

Sorkari ketdangsür 47 shi agientsü jangiatetogo aser parnok dak disciplinary action agitsü akok ta osang ajanga ashir.

### Parliament nung Bill ka benoktsü:

Union Cabinet-i Hokolbarnü public examination question papers temai adokdaksürtem merenshitsü atema Bill ka mulunga agizükogo.

Cabinet-i Public Examinations (Prevention of Unfair Means) Act, 2024 yanglushitsü mulunga agizük aser iba bill ya Minister of State for Personnel Jitendra Singh-i taruba hopta Parliament nung benoktsü imlar.

## NSCN-IM ana küma loksaogo

Dimapur, July 24, 2026  
(Agencies): Myanmar nung amenoka aliba National Socialist Council of Nagalim (NSCN-IM) indang Eastern Flank-i provisional government ka tentetba metetdaksüogo.

Iba sorkar tasen ya NSCN-IM co-founder aser taoba chairman Isak Chishi Swu'er jabaso Ikato I. Chishi Swu lenisüba kübok lir.

July 21, 2026 nü Mt. Horeb Camp, Myanmar nung Eastern Flank indang "Extraordinary Joint Emergency Meeting" nung iba atema bangzüng renemogo ta parnoki metetdaksü. Iba senden ya vice-chairman, Lt. Gen. (Retd.) H.S. Ramsan menden ser amen.

Naga political movement-i tanü tia ajurua aliba nungi kümzüksü atema provisional government tenteter aser Naga national workers o public dang iba unified national government pusema nungittsü mepishir ta parnoki metetdaksüogo.

Iba provisional government nung Lt. Gen. (Retd.) H.S. Ramsan, Lt. Col. (Retd.) Victor Angami, Lt. Gen. A. Raman, Brig. Detail Dani aser Angyo Jacob Jingseya nunger dena lir. Maneni Ngaranmi Jagoi, Merry Ramson aser Rev. Vitovi Yeputho

### CJP-i website ka lapoker:

Külen, Cockroach Janta Party (CJP)-i website ka lapoktsü aser iba nung July 20, 2026 nü 'Sansad Chalo' march nung lungkak aiter dak tashiyim amshiba police tem maitsü jangjatsü atema noksa aser video tem bendentsü metetdaksüogo.

Delhi Police-i mapa meinyakra CJP-i ketdangsürtem anema FIR benoktsü aser okadaki aotsü ta metetdaksüogo.

"Police-i kaketshirtem dak tashiyim inyak aser lungkak aitba tetsürtem dak tim masüba inyakogo" ta CJP spokesperson Saurav Das-i ashi.

"Onoki website ka lapoker anungji lungkak aiter ajak dang parnok dak teka sangshiba police tem indang videos mesüra photographs upload asütsü ayongzüker. CJP team-i item kulitem reprangtsü aser police ketdangsür shia indang maitsü jangjatsü. Parnok anema FIRs benoktsüla" ta Das-isa ashi.

"India tesem balala nungi lawyer temi onok yarir. Police personnel anema FIRs benoktsü tetuyuba agüjang onoki court orders meshitsü. Kodang mapang arudir, parnok ajak tepuokdak yoktsüsa onoki inyaktsü. Iba ya onoki nangzüker" ta paisa shisem.

nunger advisers shimba metetdaksüogo.

Tan ita tetenzüklen NSCN-IM lenisübai Ramsan, Raman aser tanga tongti lennir aika anentsüba sülen provisional government tentetogo.

Eastern Flank-isa Ramsan, Raman, Angami, Swu aser Yeputho anentsüba tetuyubatem mali kümdaktsür aser iba ya lennirtem tebang nembangtsütsü aser Naga yimten tebilemstü atema latet tila ka agitsü atema inyakba liasü ta metetdaksüogo.

Naga yimjung olemtep nung NSCN-IM lennisübai India sorkar nem "Competencies" agütsüba magzüker kechiyong item ajanga Naga nunger shinga kübok liyonga maruba nung kongshir aser Yehzabo anema lir ta Eastern Flank-i ashi.

Th. Muivah-i November 7, 2024 nü yimtenren mapa tamakok ngura prangpong amer raratsü sangoktsüba ama NSCN-IM lenisübai meinyaktet ta parnokisa tai tongloktsü.

Centre-i 2015 Framework Agreement mapa küma meinyaktet anungji ceasefire agreement tangatetba mali kümogo aser onoki political aser armed resistance maneni inyaka aotsü ta Eastern Flank-isa metetdaksüogo.

## MDSC, Dimapur-i SAI Training Centre belentsü

Dimapur, July 24, 2026 (TYO): Multi-Disciplinary Sports Complex (MDSC), Dimapur-i Sports Authority of India (SAI) Training Centre belentsü atema Memorandum of Understanding (MoU) ka nung sign sütepogo.

July 24, 2026 nü Chief Minister's Residential Complex, Kohima nung sentong ka agidang iba MoU nung sign sütep.

"Iba MoU sign sütepba ajanga Nagaland nung saisapongbaren nung tapak tasen ka tenzüker" ta Chief Minister, Dr. Neiphiu Rio-i ashi.

"State sorkari sports ecosystem tashi itdaksütsü aser lanurtem nem maongka tuluba agütsütsü merangba Multi-Disciplinary Sports Complex, Dimapur-i SAI Training Centre belenba ajanga sayur" ta pai ashi.

"Iba training centre tasen lapokba ajanga saisapongertemi quality coaching, modern

residential facilities aser scientific support systems tajangzüker angutsü aser iba ajanga Nagaland aser North East region nung sports development tashi aittsü" ta CM Dr. Rio-i ashi.

MDSC, Dimapur nung tang SAI infrastructure projects inyakba nung temulung süa repranger aser item ajanga training ecosystem tajungba akümtsü aser Nagaland nung saisapongbaren akangshitsü ta paisa ashi.

State sorkar lanurtem dak sempet aketba ajiteta modern infrastructure, sports science, grassroots competitions, athlete welfare aser capacity building renloktsüba nung temulung agütsür. Tan ita tetenzüklen sports infrastructure projects tasen 16 sayaogo aser ano mapatong aika inyaktsü lir ta Dr. Rio-isa metetdaksü.

Deputy Director General Majushree Dayanand-i SAI tenüng nung jembidang iba ya Nagaland sorkar aser SAI tsüingda tesentaktep nung tongtipang alizüng ka lir ta ashi.

State sorkari training centre atema tesem tasen ka agütsüba aser Centre of Excellence yangluba nung yaritepba atema tenüngsang agütsür ta laisa ashi.

Nagaland nung saisapongtsü sempet tulu lir aser shitak anitetttsü aser ajungmesotsü nüngdaker ta Dayanand-isa shisem.

Iba sentong nung Youth Resources and Sports Advisor S. Keoshu Yimkhiung-i tesentepertem pelaa agizük.

"Sorkari saisapongba sempet anitetttsü aser saisapongba sobaliba akangshitsü tenangzüker lir. Iba training centre belenba ajanga saisaponger nem maongka tuluba agütsütsü" ta Keoshu-i ashi.

## Robert Kikon dang POC SO okadaki arutsü tuyur

Dimapur, July 24, 2026 (TYO): Chümoukedima nung aliba Father's House Church (FHC) nung taoba pastor Robert Kikon dang okadaki August 10, 2026 nü arutsü tetuyuba agütsüogo.

Okadaki Robert Kikon dang August 10, 2026 anepdang 1:00 ako nung okadaki arutsü metetdaksüogo.

"Mekokla, Wokha nunger Peter Chumbemo Kikon (Robert Kikon) ya Little Attic Building Kacharigaon, Dimapur nung telidak liasü aser pai POC SO ACT kübok aibelenba atema ken o benoka lir" ta Fast Track Special Court (POSCO), Dimapur,

Nagaland, Special Judge Khesheli Chishi-i sangdong ka nung ashi.

Okadaki Robert Kikon aputsü atema 'warrant of arrest' agütsü saka pa mangur aser pa jenshia senzür ta Special Judge-isa metetdaksüogo.

Anungji okadaki Robert Kikon dang August 10, 2026 anepdang 10:30 ako nung okadaki arutsü tetuyuba agütsür ta Special Judge-isa ashi.

### POC SO kübok

### Lanuchuchang aitsüogo

Maneni, Fast Track Special Court (POSCO), Dimapur-isa Lanuchuchang aitsüogo aser

temerenshi agütsüogo.

Arishi küm 33 tain Lanuchuchang Walling ya Dibua nunger lir aser tang Dobagaon, Dimapur nung lir. Pa nem March 16, 2022 nü ad interim bail agütsü saka pa jena ao aser pa bushitepa arur tatamsa July 13, 2026 nü pa Dobagaon nung para ki ka nung lia apu ta okadaki metetdaksüogo.

Fast Track Special Court, Dimapur-i Lanuchuchang dang senchi achiba den pa talangtiba agi küm 20 tashi tepuokdak ayutsü tetuyuba agütsüogo.

Okadakisa pa dang ita ka tsüingda Rs 1,00,000 bail bond agütsütsü tetuyuba agütsüogo.

## NSDMA-i Mon district nung anentsüh agi kongshia alirtem yari



Nagaland State Disaster Management Authority, Government of Nagaland-i Dimapur nungi helicopter ka nung emergency relief assistance bener oa Mon jila nung anenzüker oshizükdang agiba noksa ka angur.

Dimapur, July 24, 2026 (TYO): Nagaland State Disaster Management Authority (NSDMA)-i Mon district nung anentsüh agi takoksa ajurua aliba kibongtem nem emergency relief assistance agütsüogo.

NSDMA-i Dimapur nungi tayimtsü ajangareliefbener oa agütsü.

Külen, Konyak Students' Union, Kohima-ia crowdfunding ka agiba nungi sarutetba sen ajanga essential commodities bener oa agütsüogo.

Mon District nung tawa anentsüh tulu aluba ajanga kongshia alirtem yaritsü atema crowdfunding tenzüker aser iba relief drive maneni inyaktsü anungji temulungertemi tenla balala akok ta KSU, Kohima-i metetdaksüogo.





Tuli Assembly Constituency nungi adoksang MLA & Advisor Wb.A.Pangjung Jamir -i Tuli nung tzümetzung agi kongshiba tesem aser nübortem ajurua jajaba mapang Tuli town nung Councillor-tem aser BJP lenirtem den agiba noksa ka yangi angur. Iba mapang tzümetzung lendong nung timtem takoksa ajururtem den aria bilem o lemsatepa teyari agüja liasü (Tuli, July 23, 2026)

## PWD (NH) ajanga Tuli-Merangkong lenmang nung alinen indok

**Dimapur, Chiteni/July 24 (TYO):** Mokochung district nung tzünglu kanga sashia aruba aser alinen aluba sülen PWD (NH), Tuli Division ajanga Tuli aser Merangkong tsüngta NH-02 nung alinen mürekba mapa ka July 23, 2026 nü inyaka liasü. Iba mapang parnoki machinery aser ketdangsürtem yoka tesem balala nung alinen alua aliba yadoka tekeraba nung lenmang lapoka liasü.

## Tizit tzümetzung asoshi NPCC-i temulung shirangba o lemsateper

**Dimapur, Chiteni/July 24 (TYO):** Mon district kübok tzümetzung tesashi agi Tizit Town, Tizit Village aser Lapalampong Village nung kongshiba asoshi Nagaland Pradesh Congress Committee (NPCC) indang Communication Department ajanga temulung shirangba lemsatepa liasü. Iba ama lendong timtem ajuruaka, parnoki teyari peria monguteti lir ta angazüker. Tang ama mapang nung nisung takum kumzüksü, jenokdak tesem, chiyongtsü, tajemtsü tzü temürek, mozü, aben süoshi aser nüngdakba services agütsütsü ya mezüng südaktsütsüla. Anungji Government of Nagaland, State Disaster Management Authority aser tim agencies ajunga dang tekeraba nung teyari agütsüba mapa tenzüksü ajungshir, ta NPCC sangdong ajanga ashi. Ano Central sorkar dang item timtem agi kongshir ali nem akok tashi mapang shidak nungi teyari agütsütsü ayongzüker. Tesama aser timtem ajurua aliba kibong shia den onok nokdaka lir aser nenok asoshi sarasademtsür, ta ashi. Maneni civil society organizations, arogo, NGOs, businesses aser temeimer temi parnok den osettsüset, rongsen aser nübu agi yariteptsü ayongzüker, ta NPCC sangdong ajangasa ashi.

## Bhandari nung awareness sentong ayongzük

**Dimapur, Chiteni/July 24 (TYO):** Bhandari Town Council ajanga July 24, 2026 nü Jal Sanchay Jan Bhagidar (JSJB) campaign kübok "Catch the Rain" indang awareness sentong ka ayongzüka liasü. Iba sentong nung Likao Odyuo, Deputy Chairman, BTC menden liasü aser Khonthungia Odyuo, Chairman BTC ajanga pela agizükba o jembi. Iba sentong nung shisalen sayur EAC Bhandari, Kilangtemsu aser Er. K. Hukato Shohe, SDO (PHED) Bhandari nati tzünglu tzü bendena ayuba, tzü aliba tesem kumzüka ayuba aser tzü kanga anepalua amshiba yimyatem sayua liasü. Kechiba tzünglu tzü bendena ayutsü aser komaser tzü bendena yua mongpu mapang amshitsü ta asüba onüktem parnoki jembi liasü. Iba sentong nung shilem agirtem dang tzü kumzüka ayuba nung shilem agitsü ajungmesoa liasü aser Khosathung Tsapoe, Councillor BTC, Chanka Ward ajanga melepzüng o jembi sentong tembang.



Latitude: 26.65387  
Longitude: 94.513387  
Elevation: 712.71±13.2 m  
Accuracy: 3.0 m  
Time: 20-07-2026 11:49  
Note: NGHS LIRMEN

Tawa tzünglu kanga sashia aruba mapang Lirmen yimtak Noklangsangba Government High School kanga mejungi raksaba agi school metenzükettsüsa kumogo. Iba school kidang class takdang tenet den tesayurtem amenba takdang dena ali telongi anenoka yiogo aser iba jagi jara aser tsüngbang ajak kanga mejungi raksaa lir. Ano, school temeket nunga tanurtem metsümeshidak aser asayadak tesem ajak kanga mejungi raksaa lir. Item teraksatem kar yangi noksa nung angur.

## Watsü Mungdang-i khukhua aitsür

**Dimapur, Chiteni/July 24 (TYO):** Longkhum nung arüshi küm 26 tain Nungshisajung Ani (S/o Chubunungsang Ani) ajanga tanur tetsür arishi küm tenet (7) dak tashiyim mapa inyaka taküm raksatsüba Watsü Mungdangi khukhua aitsür, ta sangdong ka nung ashi.

Iba amala tashiyim mapa ya tatok magütsüetba aser meimchir shisatsü den mapetba mapa ka lir. Iba tashiyim mapa agi tai maketba tanur chanu ka shimang, tekolok, shisatsü ajak raksatsüba anema Watsü Mungdangi tatem tashi nokdaksü. Asen atepzüng nung sobaliba dak mapet meimchir takum raksatsüba anema tatok magütsütsüla aser ozüng ketdangsürtemi tapet mera agia temzüngi melaba ama temerenshi agüjang ta akhanger, ta Watsü Mungdang sangdong ajangasa ashi.

## Dimapur DPDB senden July 27 nü amentsü

**Dimapur, Chiteni/July 24 (TYO):** Ita shia amenba District Planning & Development Board senden July ita atema July 27, 2026 anüngdang 11:30 ako nungi tenzüka Deputy Commissioner, Dimapur indang Conference Hall nung amentsü, ta Office of the District Planning Machinery, Dimapur nungi sangdong ka nung metetdaksü. Deputy Commissioner & Vice Chairman DPDB, Dimapur, Dr. Tinojongshi Chang, NCS-i züngsem ajak dang iba senden nung arua adentsü ayongzüker, ta kasa sangdong nung ashi.



Mon nung alinen agi timtem agüja aliba kibongtem nem District Administration, Nagaon District, Assam ajanga teyari oset agütsüba July 24, 2026 nü District Administration Mon ajanga agizükdang tangokba noksa nung angur.

## Wokha DC-i NH nung gari anena aliba agentsü metetdaksür

**Dimapur, Chiteni/July 24 (TYO):** Deputy Commissioner Wokha ajanga Wokha District kübok National Highway nung temelaba makai gari anena aliba tesem GPS?stamped photographic evidence dena agitsü. National Highway Act, 2002 nung aliba ama PWD (NH) ajanga 'preliminary notices' den anogo tenet awareness period agütsütsü aser iba copy ya District Magistrate dangi yoktsü. Ano maneni aibelenra District Magistrate den State Police ajanga gari agentsü mera agitsü. Iba sülen road agencies temi agütsüba machine amshia tesem balalai bener aotsü.

Bendenba kuli ajunga idangjisa processing aser challans agütsütsü atema shima aliba police ketdangsür dangi yoktsü. Spot nung manual challans magütsütsü. Video camera amshia aibelenba tem pasasa putettsü atema Wokha district police aser sendaktepa aliba department temi Advanced Traffic Management System (ATMS) atema inyaksü.

Item inyakyim ajunga ya ita shia District Highway Safety Task Force senden amenba mapang asadangtsü. Detection and evidence

Ibai Supreme Court ajanga National Highway (Land & Traffic) Act, 2002 kübok April 13, 2026 nü obendang agütsüba ama inyaker alitsü ta ashi. Iba protocol nungya lenmang yanglurtem kumzüka ayutsü aser timtem majurui senzütsü atema multi?layered enforcement framework yanglua lir. Iba protocol benokba ajanga temelaba makai gari anena alibatem agenba nung District Administration, PWD (NH), State Police aser State Transport Department tsüngta amalitep tajungba alitsü. Iba enforcement team yagi Wokha District kübok National Highways ajunga ayimjemtsü aser team nung ADC Wokha Headquarters, Superintendent of Police Wokha mesüra parnok nungi teshimtet nübu, Executive Engineer PWD (NH) Wokha in-charge, aser District Transport Officer Wokha alitsü.

Detection and evidence



Sonam Wangchuk-i lumia longkak aitba anenogo



July 23-24 ayaterm mapang nung Gurugram nung aliba Medanta Hospital nung Sonam Wangchuk-i lumiba anenba mapang tangokba noksa nung angur. Kasa noksa nung Union Health Minister JP Nadda aser Minister of State Jitendra Singh nata angur.

**New Delhi, Chiteni/July 24 (Agencies):** NEET exam paper leak asüba aser exam balala ketdangsüa agiba nung ochimashi nung ajemdaker activist, Sonam Wangchuk-i Education Minister Dharmendra Pradhan-i menden nungi anentsüla, ta takhangba agüja anogo 26 tashi lumia longkak aita aruba sülen Brihostibar ayaterm nung lumiba anenogo.

Centre sorkari paper leaks anema inyaksü aser longkak aiter kaketshirtem anema ken o mebenoktsü, ta nangzükba sülen Wangchuk-i lumiba anenogo.

Gurugram nung aliba Medanta Hospital nung Brihostibar ayaterm mapang nung Union Health Minister JP Nadda, Minister of State Jitendra Singh aser Leh Ladakh nungi tongti lenirtem matsüngdang Wangchuk-i lumiba anen.

Brihostibarnü Union Home Minister Amit Shah leniba nung ghonda pezü shi senden amenba sülen Wangchuk-i lumiba anen.

Osang angazükba agi, Amit Shah-i JP Nadda aser Jitendra Singh na den senden amendang Wangchuk temang tamajungba dang akümba atema tebilemtsü akaba lemsatep aser kaketshirtemi longkak tesashiba aitba atema jembia liasü. Parnok senden tembangba sülen Jitendra Singh-i Wangchuk kinüngtsü Gitanjali Angmo den jembi aser la dang Wangchuk-i akhangba onüktem ataloktsütsü atema sorkar renema lir, ta metetdakja liasü.

Iba sülen Nadda aser Singh nati hospital nung Wangchuk ajurua pa nem Centre-i tezüluba nung nangzükba shidi ka agütsü, iba sülen pai lumiba anen.

Wangchuk-i X ajanga, "Tang Union Ministers JP Nadda & Dr Jitendra Singh na den Leh Ladakh nungi lenirtem matsüngdang ni anogo 26 lumia aruba anenogo," ta metetdaksü.

Paisa, "Tamalen MP aser yimtenren party balala nungi lenirtem parnok 65-i ni ajuru mesüra shidi ajanga kü dang lumiba anenang ta mepishia liasü. Linük nung rara adoktsüa akok ta arendaka aser telatetba balala nung mapang talangka o lemtepa aruba sülen ni lumiba anen. Ni nenok dang kükümü alitsü aser tesem kecha nunga rara madoktsü mepishir," ta metetdaksü.

Ato kilonser Narendra Modi-ia Wangchuk dang, "Ni Sonam dang doctor temi tuyuba ama shidak benshitsü aser tekeraba nung temang touzük atutsü mepishir. Sonam temang anema alitsü atema ni sarasademtsür," ta metetdaksü.

Centre sorkari Wangchuk dang, Parliament nung examination system atema jembitsü, NEET-UG paper leak indang jembitsü aser tetoktepba exam balala ketdangsüa agiba inyakyim melenshitsü atema jembitsü, ta nangzüka liasü.

Sorkari Wangchuk dang, longkak aiter kaketshirtem anema ken o mebenoktsü, ta nangzük. Exam ochimashi nung ajemdaker soseta asüba kaketshirtem kibongtem nem senotsü teyari agüjang, ta akhangbaji sorkari shisadangdar, ta Wangchuk-i ashi.

Taruba hopta Department of Personnel & Training kübok Bill ka benoktsü, aser iba ozüing kübok paper leak asüba nung shilem agirtem nem temerenshi tulu agütsütsü aser item ama ken

oji fast-track courts nung angadangtsü.

Hokolbar aonung Ato kilonser Modi-ia, "Hokolbarnü Cabinet nung paper leak asüba indang jembitsü. Hombarnü paper leaks anema ozüing tesashiba yanglutsü atema Bill ka benoktsü aser tekerba nung iba Bill ji agizüktsü," ta metetdaksü.

Modi-isa, "Aibelenertem puogo aser tang parnok tepuokdak lir. Kaketshirtem küm ka danga takoksa mangutsü atema onoki inyaksü. Kaketshir lakh 22-i tatidang tanaben agütsütettsü atema sorkari inyakogo," ta metetdaksü.

Ano külen Hokolbarnü Cockroach Janta Party (CJP) otongdar ana- Ashutosh Ranka aser Saurav Das nati union ministers- Nadda aser Jitendra Singh na ajurua senden menogo. Tang agi tanabenbuba parnok senden menogo.

Ghonda ana senden amenba sülen Ranka-i, sorkari CJP takhangba ana ataloktsütsü ta nangzükogo, ta metetdaksü. Soseta asüba kaketshirtem kibongtem nem senotsü teyari agütsütsü aser longkak aiter kaketshirtem anema ken o mebenoktsü ta sorkari nangzük.

CJP indang tongti takhangbaji Union Education Minister Dharmendra Pradhan menden nungi anentsütsü atema lir aser iba dak sendakba nung Ranka-i, "Dharmendra Pradhan-i menden nungi anentsüla mesüra pa menden nungi anentsütsüla. Onoki sorkar nem ibaji metetdaksüogo. Iba takhangba atema telangzüba agütsütsü atema sorkari asüing nikongdang tashi mapang meshiogo," ta metetdaksü.

Ranka-isa, Pradhan menoa menden nungi magienba ajanga longkak aitba tesashiba dang akümtsü, ta metetdaksü.

Ano külen CJP tentetsang, Abhijeet Dipke-i X ajanga, "Wangchuk-i lumiba anenba ya longkak aitba anenba temaitsü masü. Soman-i anogo 26 tashi lumiba sülen anenba atema onok pelar. Nai tasütait tanela sayuba atema nü dang pelar. Nai nü taküm bendanga agütsüba ajanga linük akasodaktsüogo. Iba linük atema nü taküm kanga senti," ta metetdaksü.



July 24, 2026 nü New Delhi nung Union Minister ana- Jitendra Singh aser JP Nadda nata Cockroach Janata Party (CJP) otongdar ana- Saurav Das aser Ashutosh Ranka na den senden amendang tangokba noksa nung angur.

Yaküm gari lendong nung nisung lakh 1.8 asü

**New Delhi, July 24 (Agencies):** 2025 küm India nung gari lendong nung nisung lakh 1.8 dak tali süogo, aser ibaji anogo shia nisung 502 asüba den kasa lir, ta sorkari metetdaksü.

Sorkari India nung küm shia gari lendong nung nisung asüba osang benden tenzükba sülen küm ka kija nung gari lendong nung nisung teimtiba asübaji 2025 küm lir.

Gari lendong nung nisung kanga bulua asübaji Uttar Pradesh liasü. 2024 küm Uttar Pradesh nung gari lendong nung nisung 24,118 asü aser 2025 küm nisung 27,550 asü. Ano gari lendong nung nisung asüba kanga ajema akümba state ji Punjab lir. 2024 küm Punjab nung gari lendong nung nisung 4,759 asü saka 2025 küm nungbo 3,062 dang asü.

Brihostibarnü Lok Sabha nung Road Transport Ministry-i iba osang ya metetdakja liasü.

States aser UTs 18 nungbo 2025 küm gari lendong nung nisung asüba kanga teimba aküm aser states/UTs 17

nungbo gari lendong nung nisung asüba ajema aküm. Ano Lakshadweep nungbo tesüiba küm ana tsüingda gari lendong nung nisung ka danga masü.

Mongintemi ashiba agi, gari lendong nung nisung asüba ajema akümtsü atema sorkari kanga meranga inyakyonga gari lendong nung nisung teimba-teimba dang asüba ya ajanga tang aliba asalentong aser inyakyimtem majungba sayur.

Talisa Maharashtra, Uttar Pradesh aser Assam state tem nungbo iba sector nung melungtet teloktemia sorkar den amalitepa inyaker, ajisüaka gari lendong nung nisung asüba ajema makümer.

Bodhbarnüa Rajya Sabha senden nung Road & Transport ministry-i, 2023-25 kümtem nung National Highways nung 'black corridors' 6,358 jangjateta liasü, aser item lenmang nung nisung nisung 37,164 süogo, ta metetdakja liasü.

Black corridors teimba aliba state temji Tamil Nadu (958), Uttar Pradesh (671) aser Karnataka (607) state tem lir.



July 24, 2026 nü Ahmedabad nung tzüinglu maneni aruba sülen yimti lenmangtem nung tzü atsünga alidak nisungtem senzüba noksa nung angur.

Police-i tashiyim amshiba ken o ana Supreme Court-i angadangtsü

**New Delhi, July 24 (Agencies):** Hokolbarnü Supreme Court-i, NEET paer leak asüba aser exam ketdangsüa agiba nung ochimashi anema longkak aitertertem dak police-i tashiyim amshiba temepishiba ken o ana July 27 nü court-i angadangtsü, ta metetdaksüogo.

Chief Justice Surya Kant, Justice Joymalya Bagchi aser Justice V Mohana nungeri akümba bench-i item temepishiba ken otem angadangtsü melungogo.

Senior advocate Gopal Sankaranarayanan-i Supreme Court bench dang, "Police-i kaketshirtem madak tashiyim tali amshiogo, anungji police aser onok na tsüingda court dang nokdaka lir," ta shia item temepishiba ken o rongdak angadangtsü mepishia liasü.

Supreme Court dang Sankaranarayanan-i, item ama tatalokba ya anogo shia ataloker, anungji item ken o ya rongdak

angadangtsüla, ta ashi.

Paisa, kaketshirtemi linük tesem ajaklen longkak aitba mapang nung police-i tashiyim amshiba atema temepishiba temeja ana agüja lir, aser anapronglangji court-i agizüka register süogo, ta metetdaksü.

Iba sülen Chief Justice-i, item ken oji July 27 nü angadangtsü, ta metetdaksü.

July 20 nü Cockroach Janta Party leniba nung Delhi nung longkak aita Parliament tsütsüleni aoba mapang nung parnok nokdangtsü atema police-i kaketshirtem dak ajok agi azük, tear gas khaloktsü aser kar dakbo rubber injang khaloktsüba osang lir.

Police aser longkak aitertertem tsüingda raradang police-a aika yiruogo. Item tatalokba dak sendakba nung July 22 nü ken o ana angadanga mapang nung Delhi High Court-ia Centre sorkar aser Delhi Police naprongla dang telangzüba agüjang ta tuyuogo.





## TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 25, 2026

### Lenmanga arogoi dang yanglutsü na ?

**K**üm shia asen lima nung arogotem lungjemer gari lenmang yanglushia agudang, pelar masü saka jashia bilemer, kechiyong nübortem jajatsüba yimkong lenmangji arogo nunger lenmang masü, ibaji state government lenmang lir, anungji state government taküm ali tashibo kibur küma government-i nübortem asoshi lenmang anepalutsü atema lemozüksüba sen agi lenmang anepalutsüla. Atangji, arogo nungertemi yimkong lenmang yanglubaji mapa tajung saka aji arogo nunger mapa masü saka Nagaland government nung PWD purtem mapa lir. Aji oda, arogoi PWD department-i inyaksüba mapa inyakba limaji kodanga merenloktsü, kechiyong arogoi inyaker asünungji PWD purtemi meinyaktsü. Kasaji, tanela nung kanga jangrayonga arogoi inyaksüba mapa PWD purtemi inyakra, iba limajia meshitaktsü, kechiyong arogo ya lenmang yanglutsü tentetba telok masü aser PWD purtema tanela anepalutsü asoshi kümtetba department masü. Aji oda, PWD purtem PWD mapa meinyak sayutsüngia jajar aser arogo nungertem sarasademtsüa mapang mangu gari lenmang yanglulen senzür ta süra asenoki alima nung gari lenmanga junga meyanglutettsü aser tanelatem kümzüksü melen tesamadang aika samadaktsütsü. Aji oda, küm shia government-i gari lenmang atema lemozüksüba senji sayutsüngiba mesüra kisüjensüba nung endoktsü asoshi masü saka nübortem jajaba lenmang anepalutsü asoshi lemozüksüba lir, anungji lenmang anepaluba nung endoktsüla. Ajisüaka, government-i nübortem jajatsüba lenmang anepalutsü asoshi sen magütsütetra, iba government-jibo maliang tajungba. Kasaji, arogo nung arogo nungertemi tenlaba senji PWD purtem nem lemozüksüba lenmang yanglushitsü asoshi tenla agütsüba masü saka Tsüngremer mapa nung arogo ajanga amshitsü asoshi agütsüba tenla lir. Ibaji kodang asenoki angatetdir, asenoki arogo nung tamangetemi agütsüba tenlabo süngojemba nunga meindoknütsü. Atangji, arogo nungertemi PWD lenmang yanglushibaji PWD purtemi meyanglutsüba agi timtem aremer maremtet yanglur, kechiyong iba lenmang nungji PWD nung tulurtembo mejajatsüa akok saka arogo nungertemjibo anogo shia jajatsü. Ajisüaka, kodang arogo nungertemi yimten yimsüsür aser ketdangsertem tamakok bushia arütsütsü aser ajungshitsü melen parnok mapajinga belenzüka inyakdir arogoi arogo memesük aser government-a government memesük küma aotsü. State government kübok PWD nung minister den Engineer in Chief aser Chief engineertemi anir engineer district aser division shia nung peria dang lir. Item ajak nemji nübortemi ita sen den teyari tapu balala agütsür, anungji parnok mapaji nübortem jajatsüba gari lenmang ajak shitak anepalutsübaji lir. Ajisüaka, ketdangser paikaji yur nübortem jajatsüba lenmang tilaka aser tatsüka anepalu mesütet nungbo PWD mali ser PWD nung ita sen atema endokba sen agiang nübortem jajatsüba lenmang anepalu tajungba asütsü. Alima nung ya nübortem asoshi terenlok mapa inyaksü atema sen mali masü lir, saka asenoki nübortem jajatsüba lenmang yanglutsü asoshi bilema bushir masü saka tanga bilema bushiba agi mangur. Atangji, arogo sen agi lenmang anepaludi asüyonga koba tashika anepalutettsü, anungji arogo mapaji lenmang yanglutettsüa shisatsü aser tashi aliba yimsüsür aser lenir Tsüngrem dang meshipet meshia sarasadema election nung shilem agitsübaji kanga tongtibang asütsü.

## OLEMSABANG

### Ochi ajanga dang Alima renloktsü akok

Sashikümla Longkumer

Alima nung tanü meimchir rajang kümdaktsüba ayawara tulutibaji chiyungtsü, chi makaba wara masü saka ochi wara ya lir. Alima kaji sen kisüng agi masü, political party kisüngi masü, saka ochi agi dang terenlok bener arutsütsü akok. Ruling party nung liakasa, sen aika centre nungi yokakasa, lenir aser nübur dak ochi makara teraksa dang bener arutsütsü. Ochimashi mapa ajanga tanü India nung terenlok maparen Nagaland teküboktiba jenjang nung lir ta asübaji, sen manguba agi masü, saka ochi makaba ajanga ta metetdi. Ochi nung rongsen ketdangsüba ajanga dang Nagaland yanglushitettsü.

Tanü nüburtem tiaji reprangdangra ochishir tezüleni yoker tiyazür metendaktsüba putu, tiyazü agi ochi kümdaktsür ochi nempangba putu, ochi jembitsü, inyaktsü, takümi lia sayutsü melen yazüyaponga tim masüba maparen jenti inyakba angur. Ochi dang jembira aser inyakra tangar kodanga memeneptsü ta election mapang jembiba, aser development mapa sen makara meinyaktettsü. Ochi shia dang kilenzüng mesüra population agütsü nung asenok subsidy, schemes balala nung tangar memeneper ta, election mapang kodang tongdir ochishia dang inyakdi asü nungbo electoral roll nung tangar memeneper ta tanü asen aliba putu ka lir. Politics nung ochi nung noktakra kodanga takok mangutsü ta aiben jembir. Yamaji tangar meneptsü merangdang, tashiyim agi takok angutsü merangdang aiben ochi ajempanga yutsür. Tanü alima kin balala rebrandangra, ochi nung noktaker lenir aikati alima tejakleni aniba azünger aser ochimashi yimsüsür kübok azüdokshi aser pei nübur tajemrep tia nung yudaktsüba angur. Asenok tera sadema, tangar den tokteptsü merangdang mesüra yakta ajangzüksü merangdang asenoki ochiji amongdoka doktsür ta metetdi.

Mika 1:1 "Ochi inyaktsü asoshi Kibubai akanger" nung ajemdaker 2023 general election nükla nung iba omen ya shimteta lir. Tsüngremji ochi aser ochiba mapa ajanga dang Tsüngrem külemtsü akok. Ochi inyakbaji Tsüngrem külemba lir. Ochi sendokbaji Tsüngrem sendokba lir. Ochi nung noktakra aser inyakba ajanga dang kija taküm aser alima nung yimchiyimjung alitsü aser terenlok bener arutsü akok.

Yihuda chubatem Yotham, Ahaz aser Hezekia tendak Kibuba o Mika ainkar dangi jungkai adok ta Mika 1:1 nungji shia angur. Ibai Assyria yimli kanga merenba mapang ka atalok. Mika mapang alima ochi samar teraksa tebenja temenen agi sünga liasü. Rongsen meimba agi raratep jenti liasü. Ochi inyakba ajanga Tsüngrem tushir ta amadok. Tsüngrem melen, ali rongsen külema aküm. Iba mapang, Mika ainkari Israel aser Yihuda nüburtem anema ochi sendokra mangyim ajurutsü aser meshi meshia samatsütsü ta shin. Temulung meyipa ochi dangi meyipra Tsüngremi tanaben Yihuda moatsütsü indanga shinba angutsü.

Mika tekong 1:8 nung ochi ya tema tazütsü inyakba mapa masü, saka nisung mulungjang taroktiba nungi adokba mulungsentsü koba agi nisung aser Tsüngrem naprongla peladaktsür aser itemji "Ochishia inyakba, yimlibilem aser temeim, aser Tsüngrem den ajemalua jajatsüba" shia angutsü. Item jaklaji makara ochi meinyaktet. "To act just", tetezü ochishia inyaktsü indang ashir. Anogoshia kechisarena nung, jembishinü aser inyaksangshi ajak nung ochi alitsüba indang ashir. Kodang ochi nung lidir tamajung bilemba, tangar ajemmoka yutsütsü bilemba, pei tajangzük asoshi ochi nempanga yutsüba, tiyazü aser ochimashi mapatem anema noktaktettsü. Ochi agi lokti ka wazüka ayutsü aser ajungkettsü atema noktaker aser inyaker. Mika tendak ochishia inyaktsü/inyakba ta asüba ya shitak aser tiyazü bendangteta jangja jangjaa metetba nisungtem ta angatettsü akok. Asen nübur yimchiyimjung, temoatsü aser takok nung linüra ochiba nem yimsü südaktsütsüla kechiaser Laishibai ashir Nai temulung telungtiba nung ochi aginür. (T. Ken 51:6). Tsüngremi kechi inyaktsü mulunger, akhanger ta sürapang OCHI ya lir, Ochi inyakra asen lima aser takum jenjangi tangar menepa akümtsü.

Tesasatsüka meimchirtemi aiben Ochi ya talisa election mapang tiyazü agi meyipsa amshir. Hau, temeim agi sünger aliba Tsüngremi kodanga meimchiri takzüba tensa aser mapang nung obendang magütsür. Asen Aortemia Election mapang nung Tsüngrem tenzükertemi ochi sayutsüngiba amajok kümdakja, asen tensa asoshi ya "shitak" ta tangatetba nung tiyazü seret aisü nung amshia lenisüba menden nung amenertem aser nütsüng ajak sakoko lia arudar. Karibo Yisui masü, saka center den sentaktepa aliba political party-i dang terenlok bener arutsütsü ta tashi jembiogo. Saka ochi jendokba ajanga Nagaland tanü tashi light aser tzü, lenmang maka lir. Kenü anogo Tsüngremer tatasaba taochi süitemadokra pai ain adoka asen tiyazü seretji meküptoktsüra, alima rangben matsungdang asen Aortem tanela, tamang, shisatsü, rongsen ketsüng, yimsüsüba kechisarena ajak nung mangsa akümba tia ajurutsü. Anungji item maksü teraksatsüba tetsübuttsü tia nungi kümzüksü asoshi asenoki tiyazü seret koba yimya balala nung amshia arudar aji ochi agi melentsü nüngdak.

Item ochi masüba inyakyim ajak atema sentsüh ya shibai otsütsü? Tsüngremia peladima? Alima dangi terenlok bener arutsüdi ma? Tangar den asen talila kar ta sayunüdag tanü ajung asaa bilemba, inyakba item memerükba tzü ajak ya asen yimti dangi yimoka aiter. Election kodang arur nisung aika ni sür shiba ali, "kya hai" ta asüküma, hospital-i khi aoba bill madoksatsüba sünnung angati sen ishikaji pocket nung semer iba jagi taküm piyong chia-ajemtsü ama asatena tangar tenüki mongui jajar. Asen tamanger rongnunga yamaji kar danga ali asü? Khi shisadangdi, tesüba mapangtem toh khi shilua reprangshidi. Item mazükmaru yimya, aser ochimashi mapaji doktsür Tsüngremi asenok dang ochishia alitsü akhanger. Ochi inyakra alima tejakleni aotsü.

Angati anguba mesüra ochimashi rongsen agi tanur züngtetdaktsüba mangutsü, ne temang metsütem dak tartsüji ilanglang, ochimashi sen agi yangluba kitem nungji na aser ni meliteti doktsür asen taküm tempangtsü shibai metet. Ochimashi rongsen ajak künübosa samatsü, election nung tangar sentsüh atsüa asen pocket-i itdaktsüba jagi talangkabo maotsü. Ali taküm tatsüka alidang Kibubai ochi inyaka alitsü akhanger. Tsüngrem den ochi nung jajadi, ochi jembidi, ochi inyakdi, süra nübur ajak ajangzüksüa asen lima nung terenlok mapa inyaktet. Ochi mapa ajanga alima tejakleni odaktsür ta nokdakdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Pirate's Cove, California nung nisung 800 dak tali bapti



July 18, 2026 nü California nung Newport Beach anasa Pirate's Cove nung Harvest Christian Fellowship-i ayongzükba "Jesus Revolution Baptism" sentong nung tangokba noksa nung angur.

**July 24, 2026:** July 18, 2026 nü California nung Newport Beach anasa Pirate's Cove nung Harvest Christian Fellowship-i ayongzükba sentong ka nung nisung 800 dak tema baptiogo.

Küm 50 tejaklen America nung Jesus Movement mapang nung nisung jenti baptiba sülen kasa tesem nung Harvest Christian Fellowship-i taküm agi küm pezübuba baptiba sentong ayongzüka agiogo.

Küm 50 tejaklen America nung tanela asentenshi milak tulu jangruba (Jesus Movement) nung ajemdaker Pirate's Cove nung "Jesus Revolution" film-a tangoka liasü.

"Jesus Revolution Baptism" ta ajaba sentong ya pastor Greg Laurie-i aniba Harvest Christian Fellowship-i ayongzüka agir. Tang tashi nung Jesus Revolution Baptism

sentongtem nung nisung 9,000 dak tema baptiogo.

"Hopta ana-asem tejaklen July 4 nü Newport Beach nung rara adoka tensa raksaa liasü, ajisüaka kasa tesem nung Tsüngrem külema benjungtepogo," ta Laurie-i metetdaksü.

Honibarnü baptirtem rongnung ka, arrshi küm 31, Troy-i, "Ni taküm tasen liner, tejenba taküm toktsüner aser Khrista sülen anidakner," ta metetdaksü.

Troy-i, "Küm ana tejaken ni yi jemer lia taoksatsü lendong tuluka ajurua liasü. Kü taküm teküboktiba jenjangi ai. Iba anepdangji ni Tsüngrem dang kü nem temaitsü ka agüjang ta sarasadema liasü. Iba aonungji ni medemertem den senzüba mapang yi aika ajem aser tekolak mejungi yirua hospital-i anir ao," ta metetdaksü.

"Anepdang ni saakba sülen

ni kütsü dang 'ni otsüla indang Laishiba züngner' ta ashi. Otsüla tamangtir ka liasü aser lai ni atema sarasademja aruogo. Tangbo la alima nungi pilaogo," ta pai ashi.

"Otsüla alima nungi pilaba mapang ni mezüng Tsüngrem ajurua liasü. La kodaki anir oang ta ni sarasadema liasü. Yamaji laia ni kodak senmanger ka südaktsünüa liasü," ta pai ashi.

Pastor Laurie-i Troy dang, "Nai la tanaben ajurutsü, kechiyong nai nü taküm Khrista nem bendanga agütsüogo," ta ashi.

Hopta ka tejaklen Angel Stadium nung Harvest Crusade agiba sülen baptiba sentong ya ayongzüka agiogo. Crusade nungji online ajanga adenertem densema nisung 280,000 dak tali aden aser nisung 4,200-i Khrista agizüka liasü.

# Iran nung ketdangsertemi Christian satellite TV nokdangogo

**July 24, 2026:** Iran nung Khristantem aikati Khrista osangtajung angatsü atema satellite television dak metaloker, ajisüaka tawa Iran Ministry of Intelligence-i Persia oshi nung Khristan broadcasters ya linük anema inyakba organisations lir, ta shia channel aika nokdangogo, ta osang ka ajanga metetdaksü.

Ketdangsertemisa, item broadcasters den amalitepa inyakra ozüing kübok temerenshi agütsütsü, ta metetdaksü.

Iran ketdangsertemi nokdangba satellite TV rongnung Evangelical networks Sat-7, Nejat, Seven aser Mohabat TV densema lir.

Tesüiba küm aika Iran nung ketdangsertemi Khristan ministry tem anema inyaker, Tenla kitem shibangtsür, house churches mita aoer, Khristan kaketterem pua ayur aser Islam

yimsü toktsür Khristan yimsü agizükertem ya 'linük security anema inyakertem', ta tai tonglokja apur.

Iba ama tensa ka nung Iran nung Khristantem atema Persia oshi nung satellite channels ya kanga tongtibang, kechiyong Khristantemi item channels ajanga dang Lai otem angazüker aser item channels leniba nung tekülem agir.

Khristan melungtet telok, Open Doors den jembidang Iran nung Khristan kati, Iran nung Khristantem aikati item programs ajanga dang Khrista osangtajung angazüker, aser kanga azüingmeyaka aliba Khristantemi külem tamangertem den longjemteter, ta ashi.

Iran Ministry of Intelligence-i broadcasters anema tenokdangba agütsüba dang masü saka item channels reprangertem dak-a melung

malemer.

Linük security anema inyakba ozüing tasenba kübok Khristan pongu nembo tai tonglokja ken o angadangdar. Yaküm-a Iran nung Khristantemi bendang linüktem den tesendaktep ayur ta tai tonglokja Khristan aika puogo.

Iran nung Arogo anema inyakyonga iba linük nung Khristan nütsüng maneni arener. Tang alima nung underground church tekeratiba ainba linükji Iran lir.

Islam yimsü amangertem aikati pungang-mangdang nung Yisu ajurua Yisu Khrista agizüker.

Open Doors aser US State Department 2023 religious freedom report ajanga ashiba agi, Iran nung Islam yimsü toktsür Khristan yimsü agizükertem 500,000 nungi 800,000 shi lir.

# ANOGO ABEN TSÜNGREM DEN

## Tanela tanebtsü

T.ken 105:1-4

Temang anema alitsü asoshi anogo shia chiyongtsü tatakzük vitamin aliba chiyongtsütem achitsü doctori ashir. Kasaji asenok tanelaren anema alitsü asoshi anogo shia Tsüngrem nüngdakba Dawidi ashir.

Mezüngbuba nüngdakji tenüng asangba. "O Kibuba dang tepela sayuang, aser Pa tenüng nung jajaang... Pa sayatenya mapa ajak indang shiang" (t.1,2). Pa tushiba tetezü Tsüngremi inyakba mapa ajak asoshi Pa tenüng asangba aser Pai asenok den lemsaba ajak asoshi. Tushiba tetezü Kibuba tsüngdang pelatepba kechiaser asenok Pa chirtem lir.

Sarasadem. "Pa tenüng nung jajaang" (t.1). Kodang asenok tashi, taochi aser teyari nungdaker asenoki Kibuba dang ajar. Aser Pai teti asenok dang angashir.

Kuli asübajia tongtipang. "O Kibuba dang tepela sayuang. Nübur rongnung Pa mapatem metetdakjang..." (t.1,2,3). Asenok tetushidang tushir aser sarasadem dang sür tangar dang Kibuba indang melemsatepra, asenok temesü, teladak aser pei atema bilemba taküm ka dang akümtsü. Tangar dang asenoki Paji dang Kümtetdakba lir ta asenoki ashitsü nüngdak.

Tatembangbuba taginübaji Pa jak bushitsüba. "Nenoki Kibuba aser Pa tashi bushiang: maneni Pa tejak bushiang" (t.4). O ka nung, Kibuba tejak tesangwa nung liang. Kibubai ne taküm nung menüremlokja liang aser Pa dang peladaktsütsü bushiang.

Ne temang anema alitsü anebalutsü nüngdakba ama, tanelarena anema alitsü nüngdak. Nai ne tanela timi anebaludar ma? Tsüngremi anogo shia aginüba jagi ne tanela anema aliba nung yaritsü. Anogo shia ne nüngdak tajemtiba metetta liang. Iba jagi Pa pelatsü aser Pa dangi sentsüwangshi bener arutsütsü.

**DRC nung Khristan yimtsüng ka amakdang Khristan trok tepset**

**July 24, 2026:** Democratic denji külemi Khristantem Republic of Congo (DRC) nung tamang akangshitsü atema Khristan yimtsüng ka amakba sarasademjang," ta mapang nung Arogo nung lenir metetdaksü.

ka densema Khristan trok Taküm May ita nunga North tepset. Kivu province aser Ituri province na nung ADF teloki Khristan yimtsüng aika amakdang nisung aika tepsetogo.

Mangina yim amakdang Arogo nung lenir ka aser Khristan yimtsüng aika amakdang nisung aika tepset, Khristan trok yiru aser ka samaogo.

July 14 anogo nung Khristan yim amakba mapang nungji ki ana rongdoktsü.

July 12 nungi July 16 tsüngda Beni Territory nung tatalokba balala asem nung nisung 20 dak tali tepsetogo.

Mapang shia Allied Democratic Forces (ADF) teloki North Kivu province kübok Beni Territory amaker.

Mangina amakba mapang nung pastor kati Khristan ter par kidong jenokdakja liasü.

Pastor Nkulu-i, "Tensa tamajungba dang akümer. Adianutem, yimlibilema Mangina nung alirtem kümzüka alitsü atema sarasademjang, iba

dang Islam yimsü dangi meyipang mesüra saru agüjang ta teteyuba agüja anogo züngzüksüba sülen Khristantem amaker.

Khristan melungtet telok Open Doors-i, anüdoklen tsütsü DRC nung Ebola tashidak kanga prokba agi sorkari senzüsembongba nokdanger, ibayongji Khristantem amakba osang tejangja bendentsü kanga tasak, ta metetdaksü.

Tan hopta UN nung mongintemi United Nations dang DRC sorkar aser Rwanda-i pusemba M23 telok na tsüngda ceasefire tezüngzüktep agitsü atema inyaktsüla, ta mepishiogo.



## AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

### Zü

- (n) au lanu (bamboo shoot)  
\* Tang ya zü atsüba mapang lir.

### Zübazübar

- (adv) temulung magütsü, kümdanga mali (lax, complacent)  
\* Asenok zübazübar aliba agi tamakok ajurur.

## OLONG PAITEP # 7577

|    |   |    |  |    |  |    |  |    |    |
|----|---|----|--|----|--|----|--|----|----|
|    | 1 |    |  | 2  |  | 3  |  | 4  |    |
|    | 5 |    |  |    |  |    |  |    |    |
|    |   |    |  |    |  | 6  |  |    | 7  |
| 8  |   |    |  | 9  |  |    |  |    |    |
|    |   |    |  |    |  |    |  |    |    |
| 10 |   | 11 |  | 12 |  |    |  |    |    |
|    |   |    |  |    |  |    |  |    | 13 |
|    |   |    |  | 14 |  | 15 |  | 16 |    |
| 17 |   |    |  |    |  |    |  |    |    |
|    |   |    |  | 18 |  |    |  |    |    |
| 19 |   |    |  |    |  |    |  |    |    |

### TIPIEN

2. Talang masü  
5. Tebur chanu  
6. Tanela lima  
8. Ozü ka tenüing  
9. Telongtet  
11. Lung nung tapok  
14. Aginüdahtsü  
16. A \_\_\_ok  
17. Sünküm  
18. Tenük-i mangur  
19. Tanü ser külen

-5

-6

-5

-3

-3

-7

-3

-3

-5

-6

-5

### LANGTSÜNGLEN

1. Nguyutep  
2. Tetsüing-i ao  
3. Tajungba akümtsü merang  
4. Temokong masü  
7. Sakü  
10. Yaria inyaksem  
11. Kioktsü yangluba tetong  
12. Tzü mamongba tou  
13. Tekolak nung enokba  
15. Bilemba dang nungi teimba

-5

-4

-6

-6

-4

-4

-6

-6

-5

-5

## OLONG PAITEP # 7576 TELANGZÜBA

### TIPIEN:

1. Yiar, 3. Tesola, 7. Yimra,  
2. Tangar, 9. Peria, 10. Tanur,  
3. Tasen, 13. Lemjem, 15. Tambu,  
16. Khuret, 17. Sang.

### LANGTSÜNGLEN:

1. Yimti, 2. Amen, 4. Shiner, 5. Alaka,  
6. Satan, 9. Putet, 10. Tembar,  
2. Tatok, 12. Amang, 14. Jala.

## NAI-A YA METETTER MA



Indian ultra-marathoner Sufiya Sufi-i anogo 68 ser ghonda 23 nung Kanyakumari nungi Kashmir tashi kilometre 4,167 asemogo aser iba ajanga world record tasen ka yangluogo.

Sufiya Sufi dang Sufiya Khan ta-a ajar aser lai 'Run for Dreams' campaign tagidak nung iba ya shilem ka lir. Lai 5,000-kilometre endurance expedition ka agir Ladakh kübok Karakoram Pass nung tembangtsü nükjidong lir. Sufiya-i May 12, 2026 nü Kanyakumari nungi asemtsü tenzük aser July 20, 2026 nü Srinagar atong. Iba mapang lai anogoshia kilometre 60-70 shi asem aser anü tatsük, tzunglu, highways aser tenemtem ajanga asemogo.

## Manipur DGP Mukesh-i Moreh nung security tensa asadang



Imphal, July 24, 2026

(Agencies): Manipur Director General of Police (DGP) Mukesh Singh-i July 24, 2026 nü Tegnoupal district nung security situation aser operational preparedness meyipa repringhiogo.

DGP Mukesh-i security forces dang linük anema inyaksangshirtem azüoktsü aser Indo-Myanmar arrtsülen amalitep akangshitsü tetuyuba agütsü.

Tanü Additional Director General of Police (Law and Order)-i meina DGP Mukesh-i Tegnoupal District Police Office semdanga arrtsülen aliba district nung police

inyakyim aser security tensa asadanga liasü.

Pai district police ketdangsürtem den sensaksemdang anti-national elements anema mapa tuluba inyaksü, tekaratiba nung bushisüngdang asütsü, anti-drug drives ulushitsü, özüng alema prangpong-injangtem bushitsü aser security agencies tsüngda amalitep tajung alitsü metetdaksü.

Moreh nung DGP Mukesh-i Tamil, Kuki, Nepali aser Meitei Pangal nunger dena kin balala nungi teshimtet nübotem den ajurutepa senden amen. Iba senden nungsa civil society organizations züngsemtemia

shilem agi aser jila nung security tensa indang tebilembatem lemsatop.

DGP Mukesh-isa 36 Assam Rifles aser 3 Assam Rifles nungi Commandant tem den senden amen. Idangji Assam Rifles aser Manipur Police Commandos ketdangsürtem aden.

Paisa Moreh international border nung Gate No. 1 aser Gate No. 2 nung security maparen repringdanga liasü.

DGP Mukesh meyipa aodang Kwatha village semdang aser idakji Meitei nunger District Police, Central Armed Police Forces (CAPFs) o Assam Rifles den ajurutep.

## Assam courts nung ken o lakh 5.75 tema mangadang lir

Guwahati, July 24, 2026

(Agencies): Assam nung okadak balala nung ken o lakh 5.75 tema mangadangi lir aser külen judicial posts 40 tazüing lir ta state sorkari metetdaksüogo.

MLA Jakir Hussain Sikdar-i assembly nung asüngdangba ka langzüdang Law and Justice Minister Sushanta Borgohain-i iba osang lemsatop.

Assam nung sanctioned judicial posts 486 lir aser iba nungi 446 nung nübo lir. Tanüingba mapa 40 tazüing

asoshi nübotem anioktsü maparen teinyakdak lir. Ajisüaka courts karbo infrastructure shitak maliba agi melapok lir ta Minister Borgohain-i ashi.

May 31, 2026 tashi nung state kübok okadak balala nung ken o 5,75,541 mangadang lir. Iba nung civil cases 1,14,296 aser criminal cases 4,61,245 lir.

Assam nung Fast Track Courts 40 aser Special Courts 6 lir saka Commercial Courts ka danga mali ta paisa

metetdaksü.

Tetsürtem dak sendakba ken o tem tekaraba nung angadanga tembangtsü atema 181 Women Helpline, Sakhi One Stop Centres, POC SO Courts, Child-Friendly Police Centres, the Shishu Mitra Helpline aser e-Courts Project tenzuka lir ta Borgohain-isa ashi.

Tesüba küm pungu tsüngda Lok Adalats ajanga ken o 5,71,226 angadanga tembangogo aser iba ajanga backlog ajema kümogo ta paisa shisem.

## Küm 6 sülen Arunachal nung Pangsau Pass haat lapokogo



Itanagar, July 24, 2026

(Agencies): Arunachal Pradesh kübok Changlang district nung July 20, 2026 nü küm trok tashi shibanga ayuba sülen Pangsau Pass border haat lapokogo.

Iba ajanga India-Myanmar tsüngda cross-border trade, tourism aser economic activity tajungba akümtsü imlar.

Pangsau Pass border haat ya international border nung lir aser itashia 10, 20 aser 30 anogotem lapoktsü.

Nampong MLA Laisam

Simai-i haat lapokba anogo nung semdanga liasü aser pai shishilembartem, semdangi arurtem aser local administration ketdangsürtem den ajurutepa sensaksem.

Iba haat lapokba ajanga India aser Myanmar tsüngda tesentaktep akangshitsü aser iba tesem nung rongsenketzüing renloka aotsü ta pai ashi.

"Küm trok lir külen border haat, Pangsau Pass, Nampong lapokba tepela osang metetdaksür" ta MLA Simai-i ashi.

Pangsau Pass border haat ya kanga mazüing aliba centre ka liasü. Iba haat nung linük anaprong nungi yimdaklirtemi locally produced farm goods, traditional handicrafts aser essential commodities lemsatopa arua liasü.

Iba haat tanaben lapokba ya local community lennirtem aser shishilembartemi pelashishia agizükogo. Iba shishilembadak ajanga parnok tepok mesütsü aser tourists o tesemdangertem atsür arutsü ta yimdaklirtemi ashi.



GOVERNMENT OF NAGALAND  
DIRECTORATE OF A.H & VETERINARY SERVICES  
NAGALAND:: KOHIMA

DECLARATION OF RESULT

NO.VET/EST-3/LEGAL/1(Pt)/2026-27: In pursuance to the Advertisement NO.VET/EST-3/LEGAL(PT)/1/2026-27/1615-21 dated 3rd July, 2026 and Government Approval Vide letter No.AHV/EST-37/VERIFICATION/2026(PT-1)/193 dated 27th June, 2026 and on the basis of marks secured by the candidates in the Interview, the following candidates are selected on the basis of merit as indicated below:

| Sl. No. | Name of the candidate                                                                  | Name of post          | Place of Posting                 |
|---------|----------------------------------------------------------------------------------------|-----------------------|----------------------------------|
|         | Kumari. Talirenla Pongen (Sl. No. 37)                                                  | Medicine Carrier (MC) | Veterinary Hospital, Mokokchung. |
|         | 1. Shri. Supongwapang Longkumer (Sl. No. 2)<br>2. Kumari. Sentimenla Jamir (Sl. No. 5) | MTS                   |                                  |
|         | 1. Shri. Benathung R Shitiri (Sl. No.2)                                                | Medicine Carrier      | VHC, Sungro, CVO, Wokha          |

Waiting list in order of merit for Medicine Carrier/MTS at VH, Mokokchung :  
1. Shri.ChubayangerAo (Sl. No. 27).  
2. Shri. SutsunglongTzudir (Sl. No. 103)  
3. Shri. Tongpangyangba Jamir (Sl. No. 55)  
Waiting list for Medicine Carrier at VHC, Sungro :Shri. Mhachan Z Ngullie(Sl.no. 1)  
**N.B:**  
1. The waiting list shall remain valid for a period of 6(six) months only from the date of issue of this order.  
2. Candidate included in the waiting list shall be considered for appointment subject to the condition that if a selected candidate fails to join the service within the stipulated time of joining or resign from service or demise within six months.  
3. The waiting list shall be applicable strictly against the post advertised only.

Sd/- DR. KUOKEHEBI GWIRIE  
DIRECTOR  
A.H. & VETERINARY SERVICES  
NAGALAND : KOHIMA.

UNGMA PONGENTSÜRTEMI (YALANGTSÜR)

TENÜNGSANG AGÜTSÜR

GURU SANGYUSANG PONGENER Ungma, S/o Lt. Chutisang Pongener, pai India nung Civil Award rongnung tulutiba **PADMA SHRI AWARD** ngutetba ya pai pa lanuwa nungi asen Aor sobaliba otsü olem kenten menu aser yartsüngsang meteta aliba agi Naga lima, India lima aser ano India adena oa Thailand linük tashi oa pai metetba sobaliba yartsüngsang shilem agia senzüba item ajak achiteta India lima temaba pangdakpuri pa nem temaba **PADMA SHRI AWARD** konang agütsü nung Ungma Pongentsür Telongjem ajanga pa nem tenüngsang agütsür.



Sd/- Alemla  
President  
Ungma Pongentsür Telongjem

Sd/- Akala  
Secretary  
Ungma Pongentsür Telongjem



GOVERNMENT OF NAGALAND  
DIRECTORATE OF TECHNICAL EDUCATION  
Nagaland : Kohima - 797 004



Dt. Kohima, the 24th July, '2026.

NOTIFICATION

NO.DTE/ESTT-2/NEET/02/2026/This is to inform all NEET-(UG) 2026 candidates who have applied for MBBS, BDS, and allied courses for the 2026-2027 academic session that the "Candidate List" for the State of Nagaland is now available.  
You can find the list on the Department of Technical Education website:www.dte.nagaland.gov.in and on the Notice Board at the Directorate of Technical Education, Nagaland, Kohima.

Please note:  
■ This list is based on the NEET score cards submitted by candidates.  
■ It is NOT the official merit list.  
■ The official State Merit List will be published after receiving results from the concerned Ministry.  
This list is provided to assist students in smoothly navigating the CUET counselling process.

NOTE: Non-NEET List has also been uploaded for students' reference.

(ER. VIPULHOU LHOUNGU)  
Director

TENÜNGSANG AGÜTSÜR

Mopungchuket Senso Mungdang aser Mopungchuket Sports Federation ajanga Wb. Watinüksüng Jamir, Joint Secretary, Nagaland Cricket Association, Honorary President, Nagaland Cricket Association menden ajangzüktettba asoshi tenüngsang agütsür.  
Joint Secretary menden nung mapa tajung aika takok ngua inyaktetter Honorary President, tematiba menden ajangzüktetba ajanga yimer atema dang masü saka Naga nunger ajak tenüng ajungkettsüogo aser ne sempet aser meranga inyakba shisanger. Tarütsü anogotem ne wadang aser sempet Tsüngremi maneni moajang.

Sd/ Nukshitemjen Lemtur  
General Secretary  
Mopungchuket Senso Mungdang

Sd/ Akumyanger Lemtur  
General Secretary  
Mopungchuket Sports Federation

# Red Sea nung amakba atema Iran aser Houthis merenshitsü: Trump

**Dubai, Chiteni/July 24 (Agencies):** Yemen nung aliba Houthi telungpuri Red Sea nung Saudi oil tankers ana amakba sülen US Tir Donald Trump-i Iran aser par Houthi tembar tem dak mitkar ajanga temerenshi tulu agütsütsü nangzüka Middle East rara ya rong senzüba lenmang tanabuba tashi aor. Iba yagi tzüyim nung ano lenmang ka shibanga alima nung totzü jenjang tali akumtsü ta tetsübo nung lir. Rara tembangtsü asoshi interim truce ka yangluba raksar hopta ana junga arudang US mitkari Brehostibar aonung aser Hokulbarnep Iran dak tayimtsü amshia amak, koba anogo 13 ashitena ammanung amakba alitsü, aser iba yongji Iran-ia kidanger US sepaitem aliba Arab linüktem nung amak. Brehostibar aser Hokulbar aonung Strait of Hormuz

nung aliba Qeshm Island nung missiles khaloktsü ta Iranian state media ajanga ashi. US indang missile ka Ahvaz yimti nung khaloktsüba nunga nisung pezü tepset aser pongu yiru, ta state broadcaster IRIB ajanga ashi. Houthi nungeri Brehostibarnü tankers ana nung ama ta ashiba sülen Trump-i, Houthis-i tarutsü nung amakba atema Iran khuret asütsü, ta shia liasü. Houthis yagi Yemen north aser west amokbanga lir aser parnoki Saudi Arabia rong tem nokdanger ta ashir, shirnoki Strait of Hormuz nung Iran-i nokdanga aliba paidoktsü mechi anogoshi pipeline ajanga Red Sea leni anogoshi totzü barrels million aika abener. "Ano parnoki yamaji inyakra, US-i Iran nem tai agütsütsü, kechiyong Houthi nunger ya Iran indang surro-

gate aser/ mesüra proxy lir aser parnok anema mitkar temerenshi tulu agütsütsü aser atangji Houthis dena merenshitsü," ta Trump-i so-cial media nung zülü. Pai Axios dang Iran nung tongpang rara tulu tanaben tenzüktü atema shisadanger aser telemtetba ka agitsü anasa lir ta ashi. Social media nung Trump-i, "Khu abenba rong raksatsüba atema Iran nunger sen agütsütsü," ta pai United States ket nung aliba Iran nunger indang senotsü athishia ashi. Yangji Iranian Foreign Minister Abbas Arachi-i langzüa, "Tesüiba mapang ataloka aliba nung ajemdaker tarutsü nunga ataloktsü ama linük ka indang rongsen agitsü jembiba ya tim masü," ta ashi. Sorkar temi iba ama rongsen agiba ya yimya ka ama kumdaktsüra shinga

indang rongsena kumzüka mali, ta pai Hokulbarnü ashi. "Iba sülen atalokba ya tajung mesüra yimjung masütsü." Houthi nungeri Red Sea mokdangba sangdongtsü anogo ishika lia Iran indang Revolutionary Guard com-manders, military advisers aser missile aser drone dak sendakba hadir tem Yemen-i bener ao ta osangtem ajanga ashir. Ajisüaka Houthi nungeri iba osang shidak masü ta ashir. Maritime security osang ka ajanga ashiba agi, Bodhbar aonung Yemen north tsütsü Red Sea nung Saudi meyong Jizan rongnendak anasa missile kati kongshio go ta Encelia-i "distress call" yoka liasü. Houthi nungeri tankers nung amakba ajanga Bab el-Mandeb strait - the "Gate of Tears" - shibangtsü akok, kobai Red

Sea nungi Indian Ocean-i aruba azüoker, aser ibai Gulf nung energy markets asoshi tongtipang tzü lenmang rongnung Strait of Hormuz sülen lir. Parnoki Red Sea nung mokdangba sangdongba sülen tankers aika Bab el-Mandeb paidoktsü mechi lenmang tanga amshi. Parnoki north tsütsü Suez Canal amshir, koba kanga agi talangba aser sen timba indoka Asia nung custom-ers tongtsür. Iran-i Jordan nung U.S. missile systems, nok-nü aser totzü ayudak tesemtem aser Kuwait nung US military posts tem makogo ta ashir. US-i par infrastructure aser tzükumlen tesemtem nung amakba manen tashi Iran-ia tayang kepzüka amaktsü, ta Iranian military spokesperson Brigadier General Mohammad Akraminia-i ashi.



## MDTTA-i free coaching camp ayongzük

July 30 nungi Inter-School Table Tennis Tournament ayonger



Free TT Coaching Camp nung adenertem, tesayur aser MDTTA ketdangsürtem külemi tangokba noksa nung angur.

**Mokokchung, 23rd July**

**(TYO):** July 13th nungi July 23rd tashi Mokokchung District Table Tennis Association (MDTTA)-i school tanurtem atema 'Free Table Tennis Coaching Camp' ka yangi Multi-purpose Indoor Stadium, Mokokchung nung takok ngua ayongogo. Iba camp ya district nung saisabong ajungkettsü aser tajungba

kümdaktsütsü nükjidadong nung ayongzük. Anogo 11 nü agiba camp nung parnok 50 shi-i shilem agia aden aser MDTTA indang certified coach-temi tesayuba balala agüja liasü, ta MDTTA osang ka ajanga metetdaksü.

Coaching camp sülen ya MDTTA-i July 30 aser 31, 2026 anogo ananü 'Inter-School Table Tennis Tourna-

ment' ka ayongzükä akatsü renemdar. Iba asayamung ajanga lanurtem nem tetoktepba sabang agütsütsü aser saisabong tsütsü shilem agidaktsütsü nükjidadong yur ayonger, ta MDTTA-isa metetdaksü. Iba camp takok ngua agitettsüsa teyaritepertem aser shilem agir kija, kaketrijutem aser lokti tentet ajak dang pelaba MDTTA-isa metetdaksü.

## Anand-i khen atema FIDE tir inyaka alitsü



**New Delhi, Chiteni/July 24**

**(Agencies):** Ponguben World Champion bena alisang Viswanathan Anand-i Hokulbarnü International Chess Federation (FIDE) indang tir inyaka alitsü mapa agizükogo, koba European Union ajanga tang teinyakdak tir Arkady Dvorkovich nem tenokdangba agütsüba sülen iba temelenshi ya arur alitsü.

EU indang 21st sanctions package nung Dvorkovich tenüng ya densem, koba Ukraine anema tashiyim agi raraba mechi Russia nem tenokdangba agütsüba nung ibai shilem ka lir.

Arishi küm 54 tain Dvorkovich ya 2012 nungi 2018 tashi Russia indang Deputy Prime Minister inyaka liasü, aser 2018 küm

FIDE tir election nung Georgios Makropoulos madak takok anguba sülen pa iba menden nung mena liasü.

Anand ya 2022 küm Dvorkovich den külemi liasü aser FIDE tir ka ama Russia nungba tanaben shimba nung pai shilem tulu agia liasü. Iba yongji Mahabalipuram Chess Olympiad alitsü anasa Chennai nung 2022 FIDE Congress mapang Anand-i Andrii Baryshpolets aser Peter Heine Nielsen madak takok ngua deputy FIDE president shima liasü.

Anand-i FIDE deputy president asoshi metokteptsü ta tejangja shiogo. Ajisüaka Dvorkovich kümsük asem buba tir asoshi September ita Samarkand nung elections agiba mapang Dvorkovich den maneni yariteptsü.



Asian U20 Athletics Championship nung otsü yangluba sülen India tsür Tahura Khatun-i World U20 Athletics Championship title angutsü nükjidadong lir, kong lai Mixed 4x400 meters relay nung tokteptsü.

## ISSF WORLD CUP : 10m Air Pistol tetoktepba nung Sainyam-i silver angu

**Hangzhou, Chiteni/July 24**

**(Agencies):** Hangzhou, China nung ISSF World Cup Rifle/Pistol/Shotgun tetoktepba nung India tsür Sainyam-i tetsür 10m Air Pistol event nung silver medal ngua iba asayamung nung India nunger medal tally tenzüktüsügo.

Final nung Sainyam-i 243.4 points nguteta iba alizüng tongtet. Lai 579 points nguteta final asoshi qualify süa liasü.

Lai Hangzhou nung ama New Delhi nunga national selection trials mapang 243.1 nguteta 10m Air Pistol Trial 2 (T2) finals nung la temaba jenjang nung liasü.

Iba kasa yimya nung lai Doha nung ISSF World Cup Final nunga silver medal ka ngua liasü.

Chandigarh nungi arishi küm 22 tain Sainyam ya international ranks nung meilongi süaka temaba jenjangi atuba mapang ka lir,



shibai 2023 küm Suhl nung ISSF Junior World Cup aser Changwon nung ISSF Junior World Championships mapang gold medals ngua liasü aser Khelo India Youth Games nunga takoker rongnung aden.

Kasa mapang Suruchi Inder Singh-ia 579-20 nung qualify süa jenjang tenet buba nung eight-woman final tongogo.

## Pep -i Italy manager mapa magizük

**Rome, Chiteni/July 24**

**(Agencies):** Pep Guardiola dang Italian national team indang coach inyaktsü asüngdangba pai magizük.

Hopta tetenzüklen Italian Football Federation (FIGC) tir Giovanni Malago-i Guardiola den jembishinüogo aser pa itasen asoshi atema tanger nem magütsüba ama agütsütsü akok, ta shia liasü. Guardiola ya küm ter sülen taküm meyi mapang Manchester City yutsür lir.

Brehostibarnü FIGC technical director Paolo Maldini-i ashiba agi, Italy-i taoba mapang asayar Carlo Ancelotti dang asüngdang, shiba tang Brazil coach lir.

Ancelotti-ia pa tang inyaka aliba mapa ang maneni inyaktsü ta langzü aser Guardiola-i FIGC dang pai bilemba ama asaya nungi anisüngzüka kibong den mapang tali indoka senzüsempongtsü jangraba ang metetdaksü.

Itasen aika den ano FIGC yagi Guardiola dang pai tapet ta bilemba yimya nung mapa inyakdaksütsü ashi ta



angateter, shirnoki alima nung coach tajungtiba rongnung ka ta züngshisang nem World Cup asemben ashidena masayatetba team ketdangsüdaktsüner.

Ajisüaka pai mapang tatsüka agia asadangba sülen iba mapa magizük.

Anungji taoba mapang asayar Andrea Pirlo, shiba tang Dubai nung aliba United FC indang head coach inyaker, pa nem National League group ajanga Italy anitettsü mapa nungloktsütsü akok, kong France, Belgium aser Turkey lir aser iba sülen Euro 2028 atema qualify asütsü merangtsü.

## BILEMDANGANG

**"Shisa takatiba aser tamachitiba nisungtemi kodanga memelenshir."**